


建康實錄




漢書門			
八	三	六	類
六	八	六	架
一	二	二	冊

內閣文庫			
六	八	六	類
五	一	三	架
二	二	六	冊

內閣文庫			
番號	漢	8836	
冊數	12(12)		
函號	285	76	

二十尾



建康實錄卷第二十

陳書下

高宗孝宣皇帝頊

後主長城公叔寶

高宗孝宣皇帝諱頊字紹世世祖母弟始興昭烈王

第二子梁中大通二年辛酉生於鄉里產夕有赤光

滿室帝少寬大多智略及長美容儀身長八尺垂手

過膝有勇力善騎射高祖平侯景梁元帝使徵高祖


子姪入侍帝赴江陵累官至直閣將軍中書侍郎忽

酒醉假寐於室馬軍主李總見是大龍乃驚走人密

竒之江陵陷帝隨例遷于關右高祖卽位未定初遙

襲封爲始興郡王文帝嗣位遙改安成王天嘉三年

自周還累至侍中廢帝立進驃騎大將軍錄尚書尋



轉太傅楊州牧

光天二年十一月甲寅慈訓太后黜廢帝為臨海王而召帝入

三年正月甲午改元太建元年即位於太極前殿大赦進文武位一等復太后尊號曰太皇太后退文皇太后沈氏為文皇后后字妙姬吳興武康人建成侯法深之女永定元年策為臨川王妃世祖即位為皇后廢帝即位尊為皇太后及安成秉政后憂悶計無所出乃賂宦者蔣裕令誘建安人張安國使據郡反因此以圖安成尋而事覺遂誅安國等及帝立乃黜后為文皇后

案陳書后傳陳亡入隋大業初又口安東歸江南頃之卒

乙未謁太廟立妃柳

氏為皇后以嫡子叔寶為皇太子封諸子為郡

西使御史出西方觀行風俗以沈欽為左僕射

為右僕射辛丑祀南郊七月辛卯太子納妃沈氏王

公已下賜帛有差十月廣州刺史歐陽紇據南海反

詔章昭達討平之 紇字奉聖長沙臨湘人父願梁

左衛將軍紇隨蘭欽南征東獠擒陳文徹獲輜重及

獻銅鼓累代無此器高祖即位進散騎常侍封陽山

公紇有幹略天嘉四年除黃門侍郎遷安遠將軍襲

封陽山郡公都督交廣越定明新高合羅愛建宜黃

利雙石等十九州軍事廣州刺史在州十餘年威名

著於西越帝以紇久在南方意口疑之太建元年詔

徵還朝廷紇懼未敢就左右乃勸令反遂舉兵攻衡州衡州刺史錢道戢告變帝遣章昭達討擒紇送京師年三十三家口籍沒

案陳書江總紇之故人收其子詢撫養之及長善草隸書博學著藝宣百卷皇朝位

銀青光祿大夫也

大建二年春正月丙申太皇太后崩於紫極殿祔葬萬安陵謚曰宣太后太后字要兒幼為章氏養因姓章氏母蘇氏嘗遇道士以龜遺之光彩五色曰三年有徵及期生后產夕紫光照室因失龜所在后少聰慧美容儀手爪長五寸紅白每有朞功之服則一爪先折后善書計能誦詩及楚詞高祖永定元年立為皇后及高祖崩后與中書舍人蔡景歷定策秘不發

喪乃詔世祖入纂皇業世祖即位尊為太后居慈訓宮光大元年下令黜廢帝命宣帝嗣業至是崩年六十五四月乙巳太白晝見五月齊人來弔

大建三年辛卯正月癸丑以著作徐陵為尚書僕射辛酉祀南郊二月辛巳祀明堂丁酉耕籍田三月大赦五月丹丹天竺盤盤等國貢方物八月辛丑太子釋奠於太學十二月壬辰章昭達薨昭達字伯通吳興武康人性倜儻輕財尚氣少時嘗遇相者謂達曰卿容兒大善須小虧損當富貴耳後因醉墜馬鬢角小傷相者曰未也及侯景亂昭達募鄉人援臺城為流矢所中眇其一目相者曰卿相善矣侯景平後

與文帝結君臣之分及王僧辯誅後杜龕反遣杜泰
攻長城世祖命昭達總知城內兵事以拒杜龕龕等
退走追討平之累戰功拜交州刺史隨侯安都拒王
琳於沌口爲前鋒破琳冊勲爲都督巴郢武源四州
諸軍事封欣樂縣侯給鼓吹一部天嘉四年陳寶應
與周迪等寇臨川詔昭達爲都督討平之進位前將
軍開府儀同三司初世祖曾夢昭達升於台鉉及旦以
夢告之至是侍宴世祖顧昭達曰卿憶夢否何踐償
之昭達謝之曰當効犬馬以盡臣節大建初討歐陽
紇於嶺南以功拜司空一年率師征蕭歸歸與周軍
大蓄船艦於青泥中昭達分遣偏將錢道戢程文秀

乘輕舟襲子焚其舟檝周兵又於峽下南岸築壘名
曰安蜀城兼令於江上引大索編葦爲橋以度軍糧
昭達命軍士爲長戟施於樓船上仰割其索索斷糧
絕因縱兵攻其城降之薨時年五十四

大建四年八月辛未周遣使來聘丁丑景雲見九月
庚子朔日有蝕之詔徐慶杜稜程靈洗等配食武帝
廟庭章昭達配食文帝廟庭十一月己亥夜地大震
十二月衛尉卿許亨卒亨字亨道高陽新城人晉
徵君 詢字元慶六代孫祖勇惠齊冗從僕射父懋
梁始平天門二郡太守太子庶子散騎常侍以學聞
撰毛詩風雅比興義十五卷亨少傳家業有節行博

通羣書多識前代舊事解褐梁安東王行軍參軍兼太常博士遷太尉從事中郎晉安王承制授給事黃門侍郎高祖卽位拜太中大夫領大著作修梁史初高祖誅王僧辯父子數人同瘞一穴至是無敢言者亨以故吏抗表請葬僧辯世祖許之乃與徐陵張種孔奐等以家財營葬具凡七柩自石頭城改窆於方山東南亨卒時年六十四所撰齊史五十卷文集六卷子善心入隋位至尚書度支郎有應對才遷禮部侍郎有集二十卷後爲宇文化及所害

五年春二月夜有白氣如虹自北斗貫紫微宮三月丙戌西衡州獻馬生角詔吳明徹爲征討大都督北伐統軍十萬發自白下四月大破齊師於淮南九月壬辰晦夜明乙巳吳明徹剋壽陽斬王琳傳首京師梟于朱雀航王琳太原人少無學業而彊記內敏事多記識軍中萬人盡記名姓累官梁元帝司空梁敬帝太平二年見高祖方盛梁祚漸衰懼梁社稷將亡遂與諸將謀迎梁元帝孫永嘉王莊於北齊歸立爲主號天啟元年正月設壇於南浦之南備法駕卽帝位幸江夏新宮臨定武前殿以琳爲都督中外軍事天嘉二年世祖遣侯安都討大破之琳與蕭莊俱奔齊齊以莊爲揚州刺史與王琳鎮壽春至是吳明徹破之是歲諸軍略地所在皆剋捷淮南諸郡悉平之

案梁書自侯景亂江右淮北州郡皆沒北齊及江陵陷失高祖輔政而徐嗣徽任約等招引北齊軍變江南高祖即位王琳復起上流而敗西據壽陽以歸於齊高宗即位五年大舉始收淮南之地

六年正月壬戌大赦江右淮北諸州甲申周人來聘
二月壬辰耕籍田四月庚子彗星見八月尚書右僕射周弘正卒 弘正字思行汝南安成人晉僕射顓九代孫祖顓父寶弘正幼聰惠年十五為國子生季春入學孟冬應舉解褐梁晉安王主簿累國子博士初梁武帝於城西立士林館延弘正居之以講授聽者傾朝嘗啟梁主決定周易疑義凡五十條性博物善占大同末知天下將亂謂弟弘讓曰國家厄運數年當有義兵起吾與汝何處逃刑及梁納侯景之降

弘正曰亂階此矣梁元帝平侯景徵弘正為黃門侍郎累遷散騎常侍與王褒論利害諫元帝下都建康荆峽人士皆云周王比是東人恣求東下恐非良計弘正面折曰若東人勸東下謂非良計即西人欲西豈成良策元帝大笑竟不還都及魏平江陵弘正遁歸建康高祖踐祚拜太子詹事天嘉元年遷侍中國子祭酒使長安迎安成王三年還授金紫光祿大夫進右僕射弘正善元言明釋典雖名僧碩德皆請質疑滯卒時年六十所著易疏十六卷論語疏十卷莊子疏八卷老子疏五卷孝經疏兩卷文集二十卷子墳官至吏

部郎 案陳書云弘讓亦博學天嘉初以白衣領太常卿金紫光祿大夫猶子確位南平府長史行揚州事代稱長史也

七年春正月乙亥衛將軍樊毅剋潼州城辛巳祠南
 北郊三月詔豫二兗譙徐合霍南司定等九州及所
 部在北諸郡置雲旗義士往與大軍及諸鎮守備防
 禦四月庚寅豫州刺史陳桃根獻青牛詔還百姓乙
 未桃根又獻織成羅文錦被表各二詔於雲龍門外
 焚之六月丙戌詔北征將士死王事者剋日舉哀乙
 酉改作雲龍神虎二門案宮殿簿雲龍是第二宮牆東面門晉本
 名東華門東出東掖門梁改之西對第三
 重牆万春門神虎門是第二重宮牆西面門晉本名中華門西出
 西華門木晉西掖門宋改名西華門東入對第三重宮牆千秋門秋閏九
 月壬辰吳明徹大破齊軍於呂梁是月甘露三降樂
 遊苑丁未幸樂遊採甘露宴羣臣詔於苑內覆舟山
 上立甘露亭十一月甲子南康郡獻瑞鍾一口是歲

殷不害自周還優詔拜司農卿尋遷光祿大夫 不害
 字長卿陳郡長平人祖汪父高明不害性至孝少知
 名家世儉約居甚貧窶年十七事梁累遷平北府咨
 議參軍侯景亂臺城陷文帝奔散惟不害與徐摛侍
 梁簡文於永福省及簡文幽繫請不害同處侯景許
 之不害供侍益謹簡文夜夢吞一塊土意惡之以告
 不害不害曰昔晉文出奔野人遺塊卒返其國簡文
 曰若神道有知尚冀言之不忘及元帝即位拜廷尉
 卿尋又江陵陷因失母所在常甚寒雪凍死者填滿
 溝壑不害涕泣號呼尋見死人在溝者則身自捧視
 舉體凍僵水漿不入口者七日始得母屍憑屍而哭

行路爲之悲哀及殯後與王褒庾信等同入長安布衣蔬食至此年方得還累進給事中案陳書後趙明三年隋滅陳又西入隋卒於道弟不疑不占不齊不佞

八年春正月庚辰西南紫雲見拜吳明徹爲司空錄左僕射王克爲右僕射九月立皇子叔彪爲淮南王叔齊叔文皆爲郡王

九年丁酉春正月後周滅北齊齊主高緯方禪位於其太子恒改元承光周師平郭緯與恒赴

長安齊五帝二十八年二月王子輿駕耕籍田七月庚辰大風雨震

方安陵華表癸卯震瓦棺寺重門一女子死十月吳

明徹大破周將梁士彥於呂梁修東宮城十二月移

皇太子居新宮案輿地志其地本晉東海王第後築爲永安宮程章何皇后居之宋文帝元嘉十五年始築爲東宮齊宋爲火

災焚盡梁天監五年更修築於故齊地盛加結侯景亂又燒盡陳初置太子於永福省至此居新宮

十年春正月己巳以中領軍廬陵王伯仁爲平北將軍是月散騎常侍太子右衛率韋載卒 載字德基

京兆杜陵人祖叡父正載少聰惠好學年十三沛國劉

顯問漢書中十事隨問隨答略無疑滯自歷職位常

樂退靜有田十餘頃在江乘縣之白山遂辭疾去官

築室居焉屏絕人事吉凶慶弔無所往來不入西籬

門或十年年五十八卒於家夏六月大雨震大皇寺

刹莊嚴寺露盤重陽閣東樓千秋門內槐樹鴻臚寺

府門是月司空吳明徹薨 明徹字通照秦郡人父

樹梁右軍將軍明徹幼孤性至孝年十四感墳塋未

脩家貧未辦乃勤力耕種遇大旱苗稼焦枯明徹哀憤每至田中號哭仰天告懇居數日有自田迴者云苗已更生明徹疑之及往果如所言至秋大獲足充葬用有尹生善占墓謂其兄曰君家葬日必有乘白馬逐鹿者來經墓所是最小孝子大貴之徵也至時果有應明徹樹之小子也起家梁東宮直後師侯景亂天下飢明徹有粟麥三千餘斛見鄉里飢乃白諸兄曰當今草竊人不圖生既有粟麥可與鄉里人共之於是計口平分同爲豐儉羣盜聞而避之高祖鎮京口深相要結降階執手明徹妙解天文孤虛遁甲高祖奇之以梁承聖三年請爲戎昭將軍高祖踐祚

拜散騎常侍兗州刺史宣帝大建五年加侍中都督征討諸軍事北伐賜女樂一部封南郡公總戎十萬發自京師所向皆剋捷八月進逼壽陽王琳拒守明徹乘夜攻之中宵而潰琳等退據相國城及金城明徹遏肥水以灌之城中苦濕多腹病手足皆腫死者十有六七齊遣大將皮景和率兵數十萬來援去壽春三十里頓軍諸將皆曰計將安出明徹曰兵貴在速而彼結營不進吾知其不敢戰也於是躬擐甲胄四面疾攻城中震恐一鼓而剋生擒王琳斬之傳首京師宣帝優詔褒崇加車騎大將軍豫州刺史就壽春授冊明徹於城南設壇士卒二十萬陳其旗鼓戈

甲登壇拜受成禮而退士卒無不踴躍六年率諸將渡淮北七年閏九月大破齊軍於呂梁八年進位司空九年詔明徹北侵軍至呂梁周將梁士彥拒戰頻破之會明徹苦背疾拔軍至清口衆軍皆潰明徹窮蹙就執以憂遘疾卒於長安九月乙巳立方盟壇於婁湖臨壇誓衆乙卯分遣大使以盟誓頒下四方上下相警以備周人

十一年己亥春正月龍見于南兖州永寧樓側池中七月辛卯初用大貨六銖錢丁卯於大壯觀閱武十一月戊午周將梁士彥圍我壽陽剋之又剋霍州是月以始興王叔陵爲征討大都督率水步衆軍以拒

周師十二月乙丑南北兖晉三州及盱眙山陽陽平馬頭秦郡歷陽北譙南梁等九郡民並自拔以歸建康周又進剋譙北徐二州乘勝而前自是淮南之地復盡歸于周矣

十二年庚子六月大風吹壞臯門中闕是月黃門侍郎顧野王卒 野王字希馮吳郡吳人也祖子喬父烜野王幼以儒術知名年七歲誦五經略知大旨九歲能屬文十二隨父之建安乃撰建安地記二篇及長遍觀經史精記默識天文地理著龜占候玉篆竒字無所不通起家梁太學博士中領軍府記室陳有天下遷黃門侍郎光祿卿年六十二卒野王少篤學

在物無過辭失色觀其容貌似不能言及其勵精力行皆人莫及又善丹青曾於東府六齋畫古賢命王褒書讚世人稱爲二絕又撰玉篇二十卷輿地志三十卷符瑞圖十卷顧氏譜十卷分野樞要一百卷通史要略一百卷國史紀傳二百卷續洞冥記一卷元象表一卷文集二十卷並行於世秋八月乙未周鄖州總管司馬消難以所統九州八鎮之地來降詔消難爲大都督充九州八鎮諸軍事遷司空給鼓吹女樂一部率衆江北授之大軍北伐是月遣南豫州刺史任忠率衆趨歷陽陳惠紀趨南兗州庚午散騎侍郎淳于陵剋臨江郡癸酉魯廣達剋郭默城甲戌大

雨霖丙子淳于陵剋祐州城九月周臨江太守劉顯光率衆來降是月天東南有聲如風水相激三夜乃止丁亥周將王延貴率衆來援歷陽任忠擊破之擒延貴以送建康己酉周廣陵義軍主曹藥率衆來降

十三年辛丑以晉王伯恭爲尚書左僕射袁憲爲右僕射二月乙亥親耕籍田四月乙巳分衡州始興郡爲東衡州以本衡州爲西衡州七月徵君馬樞卒樞字要理扶風郿人寓居京口祖靈慶樞少好學六歲能誦孝經論語老子及長博極經史尤善佛經及周易老子義梁邵陵王綸爲南徐州刺史引爲學士

命講維摩老子周易同日三部一齊發題論者縱橫
樞隨問剖判應接如流論者拱默而退綸甚竒之及
征侯景留書二萬餘卷與之常閑居喟然歎曰吾聞
貴爵位者以巢由爲桎梏愛山林者以伊呂爲管庫
束名實則芻芥柱下之言翫清虛則糠粃席上之論
稽之篤論亦各從其所好乃隱於茅山有終焉之志
陳天嘉元年世祖徵爲度支尚書辭不應命每王公
大人有饋餉辭不獲免者十分受一屬世亂所居盜
賊不入依托者數百家皆得全樞目精洞黃能視暗
中物常有白鷺一雙巢其庭樹馴狎欄廡年八十六
卒撰道覺論行於世九月癸亥夜大風從西北來發

屋拔樹大雨雹十二月辛巳彗星見西南是歲周靜
帝文衍遜位於隋文帝楊堅改元開皇元年周三代
五帝二十五年

十四年春正月己酉帝不豫甲寅崩于宣福殿二月
癸巳葬顯寧陵帝年四十卽位在位十四年年五十
四謚曰孝宣帝廟號高宗有子四十二人遺詔庶事
務從儉約金銀之飾不以入壙盟器皆令用瓦初帝
在田本有恢弘之度及居尊位實允天人之望于時
國步初弭創痍未復淮南之地並入于齊帝志復舊
境返侵地而疆弱懸絕適足爲禽及周滅齊乘勝而
舉略地又至江際自此懷懼既而力修城隍爲捍禦

之備獲銘曰二百年後當有癡人修吾破城者時莫測所從云

後主長城公叔寶

後主諱叔寶字元秀小字黃奴宣帝嫡長子梁承聖二年十一月戊寅生于江陵天嘉三年立爲安成王世子大建元年正月甲午立爲皇太子十四年正月甲寅宣帝崩乙卯始興王叔陵。逆叔陵字子嵩高宗第二子承聖中生於江陵天嘉三年封康樂侯少有機辯狗聲名彊梁無所摧屈大建元年封始興王出使江郢晉三州軍事始年十六政自己出寮佐莫敢預焉弟叔堅爭寵招致賓客每朝會鹵簿不肯爲

先後必分道而趨高宗不之知與叔堅後主同侍疾便陰有異志乃命典藥吏曰劉藥刀甚鈍可礪之及高宗崩倉卒之際速命左右取劍左右不寤乃取朝服木劍以進叔陵怒叔堅在側聞之知有變伺之翌日少殮叔陵取劉藥刀趨進斫後主中項後主悶絕于地太后與後主乳母東安君吳媪以身蔽之叔堅自拖叔陵并奪其刀將欲殺之後主不能處分叔陵多力自奮得脫突出雲龍門入東府召左右斷青溪橋道放東城囚以爲戰士遣人往新林追所部兵馬仍自被甲着白布帽登城西門以召百姓太后使太子舍人司馬申以後主命召蕭摩訶討之叔陵又遣記

室韋諒送鼓吹與摩訶仍謂曰事捷必以公爲台鼎
摩訶不報當日執將軍戴血譚騏驎二人送臺斬之
叔陵自知不濟乃入內沉其妃張氏及寵妾七人于
井中部麾下度小航將趨新林蕭摩訶追擒於白楊
路斬首送臺流屍于江中丁巳後主卽皇帝位於太
極前殿大赦如宣帝故事以丹陽尹長沙王叔堅爲
驃騎大將軍尊皇妣爲太后居栢香殿太后諱敬淑
姓柳氏河東解人父偃尚梁武長公主拜駙馬都尉
大寶中鄱陽太守卒官後高宗赴江陵梁元帝以后
配焉生後主江陵陷與後主俱留穰城文帝天嘉二
年高宗自周還立爲安成王妃及卽位爲皇后后美

姿容身長七尺二寸垂手過膝初錢貴妃甚寵后傾
心下之每有供奉之物其上者推於貴妃而自御其
次者高宗崩叔陵爲亂後主賴后及吳媪救護得免
是際新失淮南之地國遭大喪後主又病瘡不能聽
政百司衆務假以後主命實皆決於太后也

案陳書后陳
亡後入長安

隋大業十三年薨
於東都年八十三

甲戌於太極殿設無礙大齋詔內外百官

各薦一人是月右衛將軍秘書監傅縡下獄死 縡
字宜事北地靈州人父彝梁臨沂令縡幼聰敏七歲
能誦古詩賦至十餘萬言長爲世祖撰史學士累遷
安成王記室縡篤信佛教從興皇寺惠助法師受三
論盡通其學初有大心寺曇法師著無淨論以詆之

緯乃爲明道論用釋其難後主卽位拜秘書監中書舍人掌詔誥爲文典麗性敏速雖軍國大事下筆輒成未嘗起草然木彊不持撿操負才使氣凌侮人物朝士多銜之初施文慶沈客卿便佞親幸而緯益踈慶等因共譖毀受高麗使金後主收緯下獄緯素剛因獄中上書曰夫人君者恭事上帝子愛下人省嗜慾遠諂佞未明求衣日旰忘食是以澤被區宇慶流子孫陛下頃來酒色過度不虔郊廟小人在側宦豎弄權惡忠直如仇讎視百姓如草莽公行貨賄衆叛親離臣恐東南王氣自斯而盡書奏後主大怒頃之意解遣使謂緯曰我欲赦卿卿能改過否緯對曰臣

心如面臣而可改則心可改後主益怒命宦者李善度窮治其罪遂賜死獄中年五十五有文集十卷行世四月丙申立子胤爲皇太子賜爲父後者爵一級王公已下賚帛有差七月辛未大赦天下是月自建康至荊州江水色赤如血八月丁酉天赤如火九月設無礙大會於太極前殿捨身及乘輿御服又大赦天下辛亥夜天東北有聲如蟲飛漸移西北乙卯太白晝見

至德元年春正月大赦改元秋八月丁卯以長沙王叔堅爲司空九月丁巳天東南有聲如蟲飛冬十月

封弟九人爲郡王

案陳書封弟叔平爲湘東王叔敷臨賀王叔宣陽山王叔穆西陽王叔儉南安王叔澄南郡王叔興

武陵王叔詔樂山王叔純新興王

十二月丙辰頭利國遣使朝貢戊午夜天門自西北至東南其內青黃雜色隆隆若雷聲是歲左光祿大夫太子少傅徐陵卒。陵字孝穆東海郟人祖超之父摛梁昭戎將軍太子左衛率母王氏常夢五色雲化爲鳳集左肩上已而誕陵年數歲家人攜見寶誌上人誌以手摩頂曰天上石麒麟也光宅寺慧雲法師每嗟陵早就謂之顏回八歲能屬文十三通莊老長乃口辯縱橫起家寧蠻府參軍累遷通直散騎常侍使魏魏人館宴之日甚熱魏之主客魏收謂陵曰今日之熱當由徐公陵答曰昔王肅至此爲魏始制禮儀今僕來聘使卿復知寒暑收大慙留

連數年後隨貞陽侯蕭淵明歸陳有天下累官吏部尚書領大著作尚書僕射自陳創業文檄軍書及受禪制策皆陵所製而九錫尤美爲一代文宗亦不以此矜物於後進者接引無倦世以此重之有集三十卷子四人儉份儀傳皆至班位陵第三弟孝克少通元理曉五經正義解褐梁太學博士性至孝值侯景亂京邑大餓死者十有八九孝克養母饋粥不給其妻領軍將軍臧氏女有容色孝克謂妻曰今飢荒如此交闕供養欲假卿於富家望其彼此俱濟如何臧氏初不許之孝克乃私與媒者商量嫁與侯景將孔景行從左右以逼之臧氏涕泣而去所得穀帛悉以

養母孝克乃自剃髮爲沙門名法整兼乞食以充給焉臧氏猶念舊恩亦數私致餉饋故不之絕後景行戰死世平臧氏伺孝克於塗中累日乃見謂曰往日之事非爲相負今旣得脫當歸供養孝克嘿然無答於是歸俗更爲夫妻天嘉中徵爲剡令累遷散騎常侍國子祭酒每侍宴會無所噉至席散當其前羞膳減損高宗密記伺之見孝克取珍菓內紳帶中歸以遺母高宗咨嗟久之自後宴饗孝克前饌並遣將歸餉母後主卽位遷都官尚書陳亡隨例入長安家徒壁立母患思粳米粥不能辦母亡後遂終身噉麥有遺粳米者對之而泣開皇十九年卒於長安有子萬載

位至隋太子洗馬

至德二年甲申正月丁卯分遣八使巡省風俗夏四月以江總爲右僕射七月壬午皇太子加元服在位文武賜帛有差孝悌力田爲父後者爵一級鰥寡孤獨不能自存者人穀五石

至德三年正月戊午朔日有食之三月豐州刺史章大寶舉兵反四月豐州義軍主陳景翔斬大寶傳首京師八月戊子老人星見十一月詔修孔子廟辛巳幸長干寺大赦高麗百濟使來朝賀

至德四年九月辛元武湖肆艦闕武宴羣臣賦詩十月以江總爲尚書令謝朓爲尚書右僕射

○明元年春正月戊寅大赦改元乙未地震四月光祿大夫毛喜卒 喜字伯武滎陽武人好學善草隸書起家爲梁西昌侯參軍高祖鎮京口命喜與高宗俱往江陵謁元帝帝以喜爲尚書及江陵陷高宗遷關右喜走郢州及高宗還喜自郢州奉迎高宗遣入關以家屬爲請周冢宰宇文護執喜手曰能結二國之好者卿也遂將柳皇后及後主還初世祖謂高宗曰我諸子皆以伯爲名汝諸兒宜以叔爲稱高宗以訪於喜喜卽條自古名賢杜叔英虞叔卿等二十餘人以答世祖世祖稱善世祖崩僕射劉仲舉與右衛將軍韓子高等知朝望有歸乃矯太后令遣高宗

還東府喜入諫高宗曰陳有天下日淺海內未夷萬邦恐悚皇后深惟社稷之計令主入省共治庶績今日之言必非太后之意宗社至重伏願三思須臾奏聞音如其議後主卽位山陵未踰年置酒作樂命喜喜不懌欲進諫及升堦後主已醉喜佯爲心疾仆堦下昇去尋負氣出爲南安內史禎明元年徵還百姓沐其惠政追送者數百人道卒年七十二秋九月庚寅梁太傅安平王蕭巖荊州刺史蕭巖以其文武官寮家屬江濟還十月以蕭巖爲平東將軍乙亥割楊州吳郡置吳州以錢唐縣爲郡屬焉是歲起部尚書孫瑒卒 瑒字德璉吳郡吳人祖文惠父脩道瑒少

建康實錄 卷二十一
倜儻博學經史起家梁臨川王參軍累進平南府司馬陳高祖卽位遷散騎常侍都督荆郢武巴湘五州諸軍事安西將軍郢州刺史天嘉初封定襄侯世祖嘗從容謂瑒曰昔朱買臣願爲本郡卿有意乎乃授持節安東將軍吳郡太守給鼓吹一部將辭乘輿幸近畿餞送鄉里榮之宣帝大建四年除安西將軍荆州刺史後主嗣位拜散騎常侍兼起部尚書瑒兄弟篤睦性通泰有財皆散之親友居處奢豪宅在青溪東大路北西臨青溪溪西卽江總宅瑒家庭穿築極林泉之致歌鍾舞女當世罕儔賓客填門軒車不絕及出鎮郢州乃合十餘船爲一大舫於中立池亭植

菱荷良辰美景賓寮畢集泛長江置淥酒亦一代之勝賞又立山齋設講肆集元儒之士冬夏資奉而處已率易不以名位驕物又深有巧思多所創立及卒尚書令江總爲之銘誌後主又題銘後四十字遣左戶尚書蔡徵就宅宣敕鐫之其詞略曰秋風動竹烟水驚波幾人樵逕何處山阿今朝日月宿昔綺羅天長路遠地久靈多功名未勒此意如何世論以爲榮

世子讓早卒

案陳書次子訓知名入隋爲高康太守

○明二年春正月立皇子恮爲東陽王恬爲錢唐王夏四月戊申羣鼠無數自蔡洲岸入石頭緣淮至于青塘兩岸數日自死隨流入江是月郢州南浦水黑

如墨五月甲午東冶鑄鐵有物赤色如火大數升自天墜鎔所隆隆有聲如雷鑄鐵飛出牆外燒人家庚子廢皇太子胤爲吳興王立始安王深爲皇太子丁巳大風自西北激濤水入石頭城淮渚暴溢漂沒船舫已酉帝幸幕府山大獵初隋文帝受周禪甚敦鄰好宣帝尚不禁侵掠大建末隋兵大舉聞宣帝崩乃命班師遣使赴弔行敵國之禮書稱姓名頓首而後主益驕怠答書甚慢表云想彼統內如宜此宇宙清泰隋文覽書不悅以示朝臣清河公楊素以爲主辱臣死再拜請罪襄邑公賀若弼等並求致討後主意愈驕不虞外難荒於酒色不恤政事左右嬖倖珥貂

者五十人婦人美兒麗服以從者千餘人後主常使張貴妃孔貴人等八人夾坐江總孔範姚察等十人預宴號曰狎客先令八婦人襪彩牋制五言詩十客一時繼和遲則罰酒君臣酣飲從夕達旦以此爲常而復盛修造起土功稅市稅船徵取百端刑罰酷濫初覆舟山及蔣山松栢林冬月恒出木醴後主以爲甘露之瑞俗呼爲雀餉前後災異甚多又有神人自稱老子以遊都下與人言而不見形言吉凶多驗經三四年乃去舩下有聲云明年亂視之得嬰兒長三尺無頭又蔣山衆鳥鼓翼拊膺曰柰何帝柰何帝又建康城自壞又青龍出建陽門井中湧赤霧地生白

黑毛又大風拔朱雀門又臨平湖舊常草塞不通忽
然自通此湖孫皓末年已曾開通

吳後主末忽然自開故老相傳此湖開即太平及晉
平吳天下一統永嘉初又草穢禎明初又忽開通

案吳書江表傳云自漢末
年吳郡臨平湖草塞不通時後主又自夢黃

衣圍城有血霑階至臥牀頭而火起又有狐入其牀
下捕之不見以為妖精後主乃自賣身於佛寺為奴
以禳之又於郭內大皇寺造七層塔未畢功而火從
中起飛向石頭城燒人家無數又使人採木於湘州
棧下至牛渚磯盡沒水中既而漁人見棧浮於海上
乃起齊雲觀未就國人歌曰齊雲觀賊來無際畔始
北齊末諸省官人皆稱省主未幾而滅至是朝官亦
稱省主識者以為省主主將見省之兆也隋文帝謂

高穎曰我為百姓父母豈可阻一衣帶之水不拯蒼
生塗炭乃命大作戰船羣臣曰伐國大事事宜密之
文帝曰吾將顯行天誅何密之有使投柝流下於江
彼若能改吾又何求後主殊不知悟文帝益忿乃敕
晉王廣為元帥督八十總管致討先送璽書暴後主
二十惡又散寫詔書三十萬紙遍諭江外及隋軍繼
下江濱鎮戍相繼奏聞施文慶沈客卿掌機密並抑
而不言及隋軍臨江諸防戍船艦悉還都下江中無
一鬪艦上流諸軍鎮兵士皆阻楊素軍不得下後主
聞隋軍臨江曰王氣在此齊兵三來周人再至皆並
摧沒今虜雖來必應自敗孔範亦言無渡江之理但

奏伎縱酒作詩不輟有東宮學士張譏因皇太子以進諫曰疆寇侵境沿江無禦備之敵請停內宴以調軍事後主大怒譏字直言清河武城人祖僧寶父仲悅梁尚書祠部郎譏幼好學愛元言受業於周弘正梁大同中召補國子正言生與袁憲侍講於文德殿敕令論議諸儒莫能先發譏整容而進咨審循環辭令溫雅梁帝器之賜裾襦絹等曰表卿稽古之力進位國子博士後主在東宮新造玉柄塵尾成後主執之曰當今多士如林至於堪捉此者獨張譏耳卽手自授譏乃令於溫文殿講莊老後主卽位荒殆前政及隋軍逼江孔範等言無渡江之理唯譏知其必

濟又進諫請卹軍士後主大怒收下獄或救者僅獲免城陷隨例入長安終不仕譏性恬雅所居宅舍營山池植花果講周易莊老教授門徒年七十六卒所著書易禮詩莊老等疏共一百卷皆入秘閣子孝則嗣

○明三年春正月乙丑朔朝大霧四塞入人臯皆辛酸後三昏睡至晡乃醒是日隋將賀若弼從廣陵濟京口韓擒虎從橫江濟採石南北俱進緣江鎮戍望風盡走丙辰採石戍主徐子建馳告變是日後主方下詔曰犬羊陵縱侵竊郊畿蜂蠆有毒宜時掃定朕當親御六師廓清八表內外並可戒嚴以驃騎將軍

蕭摩訶爲皇畿大都督樊猛爲上流大都督樊毅爲下流大都督司馬消難施文慶並爲大監軍重立賞格分兵鎮守要害僧尼道士盡皆執役庚午賀若弼陷南徐州辛未韓擒虎陷南豫州後主遽詔司徒豫章王叔英屯朝追蕭摩訶屯樂遊苑樊毅屯耆闍寺魯廣達屯白土岡神武將軍孔範屯寶田寺鎮東將軍任忠屯朱雀門辛巳賀若弼進白土岡東南大破陳軍士卒奔北弼乘勝破魯廣達蕭摩訶等於樂遊苑遊騎次宮城燒北掖門是日韓擒虎率衆自新林石子墜進大將軍任忠出降乃引擒虎徑至朱雀航趨宮城自南掖門入文武百司皆遁出惟尚書令江

總吏部尚書姚察侍中王寬度支尚書王援等居省中尚書僕射袁憲後閣舍人夏侯公韻二人居殿中以侍後主俄頃隋兵至憲韻二人勸後主端坐殿上正色待之後主曰鋒刃之下未可交當吾自有計乃將張麗華孔貴嬪二妃入景陽樓井中憲韻等苦諫以身蔽井後主不從與之力爭久之方得入二人拜哭而去 袁憲字德章陳郡人尚書僕射樞之弟幼聰敏年十四召爲國子正言生在學一年博士周弘正深重其才舉高第以貴公子選尚梁簡文女南海公主起家秘書郎累遷南康內史入陳位僕射禎明三年隨伐陳軍人燒北掖門朝士皆散走獨憲與夏

侯公韻入殿侍後主後主謂曰我從來待卿不先他人今日見卿可謂歲寒然後知松栢之後凋及隋兵入閤後主遑遽避匿憲正色曰北軍兵人必無所犯大事如此陛下安之整衣冠御前殿依梁武見侯景故事後主不從因下榻馳去憲從出後堂至景陽殿後主投下井中憲等拜哭而去國陷入隋文帝嘉其雅操授開府儀同三司昌州刺史開皇十八年卒贈大將軍安成郡公謚曰簡長子承家仕隋至祕書丞是日隋軍雖亂沈皇后居處如常太子深年十五閉閣而坐舍人孔伯魚侍側及隋軍叩閤入深安坐勞之曰戎旅在塗不至勞乎旣而隋軍求後主不得因

窺井呼之後主初不應欲下石始聞吳人叫聲乃以繩引之驚其太重俄與張麗華孔貴嬪三人同乘而上隋文帝聞之大驚開府鮑宏曰東井上於天文爲秦令王都所在投井其天意耶丙戌隋晉王廣入據臺城送後主於東宮命斬張貴妃於青溪橋妃姓張氏字麗華襄陽兵家女素貧賤父兄織蓆爲業後主爲太子以選入東宮侍龔良娣給使後主見悅之因得幸生太子深後主卽位拜貴妃初始興王叔陵亂後主被傷臥於承香閣中諸妃並不能進唯貴妃侍焉至德二年於光昭殿前起臨春結綺望仙等三閣閣高數丈並數十間牕牖戶壁欄檻皆以沉檀香

木爲之又飾以金玉珠翠外施珠簾內有寶帳其服玩之屬瓌寶珍麗皆近古所未有每微風一至香聞數里朝日初照光映後庭其下積石爲山引水爲池植以奇樹雜以花果後主自居臨春閣張貴妃居結綺閣龔孔二貴嬪居望仙閣並複道交相往來又有王李二美人張薛二淑媛袁昭儀何婕妤江脩容等七人並有寵遞代以遊其閣上官人有文學如袁大捨等並爲女學士後主每引賓客同貴妃等游宴使諸貴人及女學士與諸狎客共賦新詩互相贈答采其尤艷麗者以爲曲詞被以新聲選宮女有容色者以千百數令習而誦之分部迭進持以相樂其玉樹

後庭花臨春樂等大抵所歸皆美張貴妃孔貴嬪之容色其略曰璧月夜夜滿瓊樹朝朝新皆此之類也張麗華髮長七尺鬢黑如漆其光可鑑特聰惠有神彩進止閑華容色端麗每瞻視顧盼光彩溢日照映左右常於閣上靚粧臨軒檻宮中遙望杳若神仙兼有才理辯識彊記善候人主顏色薦引宮女假鬼道以惑後主後主怠於政事百司啟奏並因宦者蔡臨兒等進之後主置張妃於膝上共決之有不能記者貴妃並爲疏條無所遺脫由是益加寵異冠絕後宮更於閣宦便佞之徒內外交結轉相引致賄賂公行綱紀替亂及隋軍陷城與後主俱入井中後爲晉王

廣斬於青溪三月己巳後主與王公卿士内外文武百司發自建康而入長安隋文詔京城權分人家第宅以禮接待之遣使迎勞使人還奏曰後主已下在路五百餘里纍纍不絕文帝歎曰一人無良以至於此及至京師列輿服器皿等於庭引後主及二太子諸王弟二十八人及司空司馬消難尚書令江總僕射袁憲驃騎將軍蕭摩訶征西將軍樊毅安北將軍魯廣達鎮東將軍任忠吏部尚書姚察中書令蔡徵散騎常侍王元規等二百餘人帝使納言宣慰內使宣詔讓後主後主伏地屏息不能祇對並赦宥之賜封長城侯文武皆隨才擢用詔下江南陳文武宣帝

陵各給五戶看守之給賜後主甚厚常引同三公之席敕樂府不奏吳音之樂恐傷其心至仁壽四年冬十一月壬子終於洛陽葬河南之芒山沈皇后自爲哀策詞甚酸楚后諱務華吳興人儀同三司沈君理之女母高祖女會稽公主早亡后年幼哀慟過禮大建三年納爲太子妃後主卽位立爲后性端靜好學工書當張貴妃盛寵勢傾後宮澹然居求賢殿未嘗有怨己之容居處儉約衣無錦繡左右近侍纔留五人唯尋閱圖史及佛經陳亡與後主俱入長安及後主薨后感其家國亡滅自爲哀誄詞甚悲切

案後主年三十卽位立七年

年年三十七以陳明三年當隋開皇九年正月二十日國亡入隋封爲長城侯後十五年五月二十二薨有子二十二初陳高祖卽

位日其夜奉朝請史普直宿省中夢有人自天而下
導從數千人至太極前殿北面執策策金字曰陳氏
五帝三十四年又後主在東宮有婦人突入唱曰畢
畢國國主主尋而不見又嘗有一足鳥集於殿庭以
觜畫地成文曰獨足上高臺茂草化爲灰欲知我家
處朱門向水開解者以爲獨足蓋指後主獨行無衆
盛草言荒穢也隋承火運草得火故爲灰矣及後主

家屬館於都水臺所謂上高臺當水開
者其言皆驗初宣帝器宇弘廓有人君之量文帝知
冢嗣仁弱早存太伯之心未及而崩既承萎蕩之後
志纂鴻運拓土開疆晚致呂梁之敗江左日蹙後主

因削弱之餘滅亡之運加以荒淫沉敗酒色過度梁
末童謠曰可憐巴馬子一日行千里不見馬上郎但
見黃塵起黃塵汚人衣阜莢相料理及王僧辯滅羣
臣以謠言奏高祖曰王僧辯本乘巴馬以擊侯景馬
上郎王字也塵爲陳也世不解阜莢之義及陳滅於
隋隋氏姓楊楊羊也說者以江東人謂殺羊角爲阜
莢言終滅於隋夫興廢之兆其由來定矣

陳朝功臣

江總字總持濟陽考城人晉散騎常侍統十代孫宋
光祿大夫洪五代孫祖奮父經皆列職中外總性至
孝少孤養於外家蕭氏好學年十八起家梁武陵王

法曹參軍累至太子洗馬侯景亂隨舅蕭勃在廣州
侯景平後梁元帝徵爲明威將軍入陳累位司徒左
長史太常卿尚書令中權將軍入隋爲上開府開皇
十四年卒於江都

蕭摩訶字元胤南蘭陵人祖覲父諒卒於始興摩訶
少孤姑夫蔡路養收養之少果毅有勇力高祖破路
養摩訶出戰敗歸侯安都常從征伐先登陷陣累至
巴山太守大建五年隨吳明徹北伐濟江攻秦郡齊
軍大至衆十餘萬其前隊有蒼頭犀角大力之號皆
身長八尺膂力絕倫又有西域胡人妙閑弓矢弦不
虛發來氣甚銳衆軍尤憚之明徹自起酌酒飲摩訶

曰關羽斬顏良正今日矣摩訶飲訖馳馬挺身入齊
軍遙擲銃覲擊中胡人又斬十餘大力者而還齊兵
莫不驚懼後從戰呂梁突衆手奪齊軍大旗屢以戰
功進驃騎大將軍侍中光祿大夫舊制三公黃閣廳
置鴟尾後特詔摩訶開黃閣門施行馬廳事寢堂並
置鴟尾仍納其女爲皇太子妃及隋軍來韓擒虎賀
若弼進至鍾山龍尾後主謂摩訶曰公可爲我一決
摩訶曰從來行陣爲國爲身今日之事兼爲妻子摩
訶引兵於賊軍南偏鎮東大將軍任忠次之護軍樊
毅尚書孔範又次之衆軍南北亘二十里首尾各不
相知遂戰魯廣達率所部俱進陣未合士卒潰散摩

訶無所用力爲隋軍所執及京師陷後主爲隋人守衛於內省摩訶請弼曰今爲囚虜命在須臾願一見舊主死無所恨弼許之摩訶入見後主俯伏號泣仍於舊厨取食進之辭訣而去守衛者皆不能仰視入隋爲開府後同漢王諒反於并州伏誅

樊毅字智烈南陽人祖方興梁同州刺史父文熾梁益州刺史叔父文皎侯景亂戰死於青溪毅陳平入關頃之卒

魯廣達字通覽吳州刺史悉達之弟廣達少聰悟慷慨愛賓客累至壯武將軍晉州刺史及王僧辯之下平侯景廣達出境候接資奉軍儲僧辯謂沈炯曰魯

晉州亦是王師東道主人進位散騎常侍陳有天下累以功勞至安南將軍侍中轉安北將軍入隋悲愴本朝淪沒發疾而卒

任忠字奉誠小名蠻奴汝陰人少孤微不爲鄉里所齒多計略膂力兼人善騎射侯景之亂率鄉里少年隨晉熙太守梅伯龍討景累遷蕩寇將軍陳有天下進號征南將軍給鼓吹一部尋加侍中信安郡王出爲吳興內史及隋軍到白土岡忠馳入啟白當具舟楫以就上流臣以死奉衛後主信之令宮人裝束以待久望不至旣而忠已率數十騎往石子岡降於韓擒虎後入隋爲開府儀同三司卒隋文帝嘗因宴集

謂羣臣曰我常恨初平陳之日不先斬任蠻奴以懲不忠

蔡徵字希祥侍中中撫軍景歷之子徵幼聰敏累遷吏部尚書爲人清簡無事京城陷入隋爲民部尚書給事中有口辯多所詳究至於仕流官宦皇宗戚屬及朝儀制度憲章軌則戶口風俗山川土地問無不對子翼位至司徒

姚察字伯審吳郡武康人六歲誦書萬餘言十二能屬文起家梁朝司文侍郎梁室傾亂崎嶇采野實以供給養入於己分減推諸弟妹乃至故舊亦皆相分自甘藜藿雖亂離之中篤學不廢陳有天下累進位

尚書祠部郎中轉祕書監領著作入隋爲祕書郎別敕成梁陳二代史隋文帝嘗召察謂朝臣曰我平陳唯得察一人而已大業二年卒於東都

王元規字正範太原晉陽人祖寶父偉早卒元規八歲而孤隨母舅氏往臨海郡年十二郡豪劉瑱有財巨萬欲以女妻之母將許焉元規泣諫曰姻不失其妻古人所重豈得苟安異壤輒婚非類母感其言而止梁時山陰縣有暴水流漂居人元規唯有一小船倉卒引其母妹并姑姪等並入船留其男女三人閣於樹杪及水退俱獲全濟世人稱其志行少好學起家爲梁相國左常侍陳有天下累遷散騎常侍南平

王府參軍自梁諸儒口口為左氏學者皆以賈逵服
 虔之義難駁杜預凡一百八十條元規引證通析無
 復疑滯。○明三年入隋為秦王府東閣祭酒年七十
 卒於廣陵所著春秋發題辭及義記十卷續經典大
 義十四卷孝經義兩卷左傳音三卷禮記音兩卷
 江寧府嘉祐三年十一月開造建康實錄並案三國志
 東西晉書并南北史校勘至嘉祐四年五月畢工凡
 二十卷總二十五萬七千五百七十七字計一十策

建康實錄卷二十

口口口口將仕郎守江寧府溧水縣主簿張庖民校正

登仕郎守江寧府句容縣主簿錢公瑾校正

將仕郎守江寧府右司理參軍曾 伉校正

口口口口朝奉郎試祕書省校書郎權江寧府節度推官熊 本校正

宣德郎守大理寺丞致仕充江寧府府學教授趙真卿校正

口口朝奉郎尚書比部員外郎通判軍府騎車都尉賜緋魚袋彭仲荀

龍圖閣直學朝散大夫右諫議大夫知軍府事兼管勸農使南壽州開國男賜紫食魚袋梅 摯

口紹興十八年十一月 日荆湖北路安撫使司重別雕印

口口口口口監轄下班祇應荆湖北路安撫使司聽候差使韓 軫

點檢下班祇應荆湖北路安撫使司主管文字高 楫

口口口校勘官左從政郎新荆門軍錄事參軍權安撫使司准備差遣王 廓

校勘官右宣教郎荆湖北路安撫使司幹辦公事張 允之

校勘官右通直郎荆湖北路安撫使司主管機宜文字石侯 虛

口口口右朝奉大夫添差荆湖北路安撫使司參議官趙 遜

右朝請大夫荆湖北路安撫使司參議官周 奉

口左朝請郎權發遣荆湖北路提點刑獄公事權荆南軍府事兼權盍安撫馬步軍都總管劉 長口

口舊衛尉都指揮使口防禦使關南軍口兼管內勸口使善荆湖北路安撫公事口都總管 口

後跋

此抄本建康實錄得之滋蘭堂朱氏者也所校改據周漪塘家汲古閣所藏宋刊本宋本紙有破損印有模糊處此悉空其字即從之抄故也首序一通宋本有而此脫胥抄亦多誤落今並補正唯元失之葉則闕如也其模糊而存痕跡求之陳壽沈約李延壽諸家之書審視熟揣補其合者未必不於宋本轉有補也小讀書堆及袁氏貞節居皆嘗倩手從此寫一部然惜其時未經較也得之以乾隆戊申今歸讀未見書齋則為嘉慶己未歲也顧廣圻記

建康實錄 跋
此鈔本建康實錄吾友顧澗蕢所藏書也初余於
小讀書堆見抱冲用此本倩人影寫詢是澗蕢物
心欲之而未敢直陳也既余於周香嚴家見有宋
本澗蕢屬余借校澗蕢謂余曰此書卽從宋本寫
出特非影寫故行款不同復多脫誤爾今得校勘
益臻美善矣知君欲之已久曷歸挿架遂以遺余
其時適有友需余抄本咸淳臨安志者余獲直卅
金澗蕢戲曰此書余亦欲獲半價余重其割愛意
卽易之昔抱冲及袁君綬皆不過借抄而今竟
歸之且視抄本更多校語澗蕢之厚予者可不謂
至耶因紀其實別有唱和詩俟附錄備攷時嘉慶

己未莫春九日棘人黃丕烈識

建康實錄郡中顧氏得滋蘭堂抄本後從汲古閣
所藏宋刊本校定者也其書歸於讀未見書齋丙
寅歲貽訓堂主人借得此本翻刻及半知余方刻
古書歸板於余、惟是書久無善本唐以後考六
朝遺事者多據以為微余購覓數年未可得今得
是本續刊成書亦翰墨中一段良緣也遂諾之其
體例悉照貽訓翻宋刻原式板心亦仍貽訓之名
惟書中宋諱有雙行注御名二字以小圈易之有
注今上御名四字者以小圈四易之存宋刻之痕
跡至

延慶寶鑑


國朝

廟諱

御名恪遵

功令缺筆恭代而此書原缺原字之處亦仍其舊云

嘉慶戊辰三月虞山張海鵬識



文化丙子



